

يشمعة فـؤادي ويشمامة الروح  
احشمك (يلكبر) اوحزني صدى النوح  
يـذخري وسـنادي ويمرهم للجروح  
فـؤادي تـفطـر ومن همومه ايوح

يا منية حياتي ومهجة احسين  
وياغصن الزرعتة بدمعة العين  
ويا دمي الجري ما بين لعروك  
وتاليها ربي بالهفة والشوك

گمر بس اشوفك أهيم بخيالي  
وكل أم ولدها في هالدنيا غالي  
أنا شلون اعوفك يتاج المعالي  
سندها وضمدها بمرور الليالي

عيني امن السهر عميت يلكبر  
وبصدري سگيتك يلمشكر  
تحرص مهدك وما شافت النوم  
وداريت التعب كله ولهموم

\*\*\*\*\*

ذابت مهجتي ارحم غربتي  
يا حيف الدهر راواني الكدر  
گرب خل اضمك للوداع  
وكل اللي بنيتة وسف ضاع

تمنيتك اذا حان الأجل مني  
أبد ما مرت ابالي تفارگني  
تغسلني وتكفني وتشيعني  
وتخليني أسيره بهمي وحزني

لكن يلحبيب مرمني الغريب  
انصر هالوحيد بنحرك والوريد  
حايير ما بگت عنده انصار  
لا تترك ابو اليممة محتار

اريد اتوفي اديونك لبو اليمه  
اريد بصولتك بس ينجلي همه  
ودمك يختلط في الحومه وي دمه  
وباچر افتخر بالجنه عند امه

\*\*\*\*\*

صد (علي الأكبر) والجفن محمر  
من الفزع هودي هالحرب عيدي  
والألـم يلـهب بـصدره نـيران  
يمه لفني العدا بعزم وإيمان

آه ما يضيع الربي  
آه موعدي كربلا  
آه انه نسل الإبا  
موتي ليّا حلا  
خفي الونه  
وساعته اتمنه

ما أذل هامى انصر الضامي  
أنصره بدمي ولحمي وعظمي  
وافدي المهجه يا يمه لجه  
وصارمي في المناحر أسله

آه بس يثور الحرب  
آه بطلي هذا الفزع  
تسمعين العجب  
نشفي جاري الدمع  
يلتحشميني  
يمه ودعيني

بدر في تمامه      بزغ للمنيه      حمل سيف ولامه      ودرع الحميه  
سرج مهره عازم      يعوف الدنيه      يخوض الملازم      ونفسه ابيه

گاید مهره والبتار بيده      جنه الموت بشفافه نشيده  
يمشي والابا يموج بوريده      والراية استراحت في زوده

أبو اليمه شافه      وهلت دموعه      كمر عمره عافه      وفارگ ربيعه  
وگف صوبه نادى      بيدر الطليعه      تريد الشهاده      شعظم هالفجيعه

تمشي برجلك وتگصد إلى الموت      وتترك (لئلى) من بعدك وحيده  
امك حايره والگلب مفتوت      ليش ابها الفلا موتك تريده

\*\*\*\*\*

ناموس الفخر      بتاره شهر      طب للمعركه والگلب نار  
تشهد صولته      وعزمه وثورته      چنه حيدر حامي الجار

هجم بالمعركه وقال كتايبيهم      يفرهدهم لضى الباتر ويرعبهم  
بيد سيفه لرواح ويسلبهم      ومن فيض الدما رمحه يخضبهم

بوادي كربلا      صارت زلزله      بس من هجمته اعلى الملازم  
سألو (بن سعد)      يوم اللي انفرده      وسألو عنه (بكر ابن غانم)

هجم صوبه فلا هابه وركز رمحه      وهالفارس من احصانه هوى بجرحه  
هجم فوگه اسد ضاري وبدا يذبحه      وابو اليمه اطمأن والمدمع يسحه

\*\*\*\*\*

خمد انفاسه      من گطع راسه      وصبغ من دمه گاع الوطيه  
بالعزم كبر      صاح أنا (لكبر)      بيدي سيف الردى والمنيه

عاد      للخيم مبتشر      طلعت اهل الخدر      ذاهله بلا راي  
عاد      والضمي يستعر      گلبه مثل الجمر      بس يريد الماي

صاح ابو اليمه      اكصد الخيمه      وطمن الوالده يا حمى الدين  
أمك الحره      تجرع الحسره      وتدعي رب السما وتهمل العين

شاف      أمه الذاهله      تجذب الونه      بالالم ذابله  
شاف      أمه الحايره      واشتعل حزنه      بالمحن صابره

طلبتك يبويه      ترويني كطره  
انا كلبى صادي      اشتعل نار وحسره  
يحلو السجيه      ترى افادي جمره  
وسف عيني غارت      وجمسي تقرى

ضمه الصدره ومنه الدمع سال  
عاين هالحرم بيني ولطفال  
ونادى طلبتك يوليدي امحال  
راوها العطش أهوال واهوال

يروحي يلكبر      يصفوة امانا  
وفي الجنه كوثر      يروحي وعدنا  
علينا تگدر      نموت بعطشنا  
(علي) بجفه (حيدر)      يروينا مننه

ودع هالحريم وللحرب روح  
تدري هالأمر مكتوب باللوح  
واهدى للديانه المهجه والروح  
نكضي بين مسموم ومذبح

\*\*\*\*\*

للعركه رجوع      بالدم والوجع  
بس شگ الصفوف      ما بين الألوف  
وعين الوالي في العركه تبراہ  
لن (العبيدي) وسفه تلگاہ

تجرى ابن الخنا بغيره وطبر راسه  
لنيم وگاسي كلبه وفاگد احساسه  
يريد ايخمد بهالطبره انفاسه  
ويريد ابها الولد يفجع هله وناسه

ظل فوگ المهر      ودمومه تخر  
واحد يضربه      آخر يسالبه  
حايير والعدا حاطت اعليه  
والدم ينزف براسه ويديه

ابو اليمه گصد صوبه وحنى ظهره  
حمل جثة گمر هاشم على صدره  
وشال (الأكبر) المغدور عن مهره  
وسدر للخيمه يهمني بخده العبره

\*\*\*\*\*

طلعت بحسره      (زينب) الحره  
شاييل (الأكبر)      يا الأخو مگدر  
تاطم الهامه من عظم لمصاب  
والله كلبى انكسر لجله وذاب

آه      كم جرح بلجسد  
آه      داميه جتته  
راح منا الولد      وسفه امگطع  
واعظم طبرته      (لكبر) امبضع

نادى يا (زينب)      والكلب يلهب  
صابه (العبيدي)      وما بگی عندي  
كسر ظهره مصابه وفجعني  
غير دم مع الحزن يجري مني

آه      صعب فگد الضنى  
آه      ضامي ابني كضى  
ظهره لجله انحى      وضاعت آمالي  
كلبه جمره غضا      عذب احوالي